

## HALDENSTEIN

## Bainprest ina segunda roda da vent?

Dapi 10 onns è la roda da vent a Haldenstein en funcziun. Ella producescha electricitad per radund 1300 chasadas. Quai è stà da quella uras in project da pionier. Era suenter 10 onns è ella anc adina l'unica roda da vent en il Grischun. Uss duai quai sa midar. Dentant enfin che quai è uschè lunsch ston ils mulins da leschas a Berna e quels dal chantun Grischun anc sa muventar in pau.

Ils iniziants da la roda da vent èn *Josias Gasser* e *Jürg Michel*. Els han mess sin pe avant 10 onns la roda cun ina autezza da 175 meters. Uss han els l'intenziun da realisar ina segunda roda da vent, 800 meters sper la roda existenta. Quella duai producir energia supplementara per radund 2000 chasadas. L'acceptanza per ina nova ovra da vent saja gronda, dian ils iniziants. Dentant na sa Josias Gasser betg cura che tuttas lubientschas èn sin maissa. Uss vegnan ils plans directivs ed ils plans d'utilisaziun fatgs dal chantun, plinavant examinaziuns ecologicas. Sch'i dat lura nagins protests cunter ina nova roda da vent lura vegn la politica communal da Cuira a sa dar giu cun quai project – e la fin finala ha il pievel da Cuira il davos pled en chausa. (rtr/fmr)



La roda da vent a Haldenstein è tenor ils iniziants sa cumprovada.

FOTO SOMEDIA/MAYK WENDT

## CUIRA

## Stgarpà tavla dal center LGBTQ+

La davosa fin d'emna è svanida ina tavla da plexiglas cun il num dal center da giuventetgna da LGBTQ+. Tenor il manader *Holger Niggemann* saja quest vandalissem drizzà explicitamain cunter persunas queeras. Ina tavla montada pli a bass fiss stada pli simpla d'allontanar, ha el ditg a las medias da la Südostschweiz. Il cas saja gia il sisavel ch'ins ha registrà quest onn en il Grischun ed en la Val dal Rain. Tenor Niggemann è quai in mussament che persunas queeras n'èn betg segiras en questa regiun. El fa attent ad in cas d'in collavuratur dal center da giuventetgna avant quatter emnas a Buchs. Il collavuratur saja vegnì attatgà sin via ed haja subi ina squassada dal tscharvè. (rtr/fmr)

## LA CIFRA DAL DI

# 40 onns

era la durada da vita probabla dad in carstgaun en Svizra l'onn 1880 – tenor il Lexicon istoric da la Svizra. (fmr/sb)

## La polizia da traffic survegn ina basa nova

A Cuira è stada l'emprima badigliada per la basa nova da la polizia da traffic. Custs: 9,8 milliuns francs.

RTR/FMR

En vischinanza da la sortida da l'autostrada Cuira Sid vegn construi ina basa per la polizia da traffic. Sper avantatgs funcziunals per la polizia duai il bajetg nov er esser in project exemplaric per bajegiar a moda persistenta.

La basa nova da la polizia da traffic dat sutteg a radund 50 collavuraturas e collavuratur – sco er a differents vehichels da la polizia. Els custs muntan a 9,8 milliuns francs.

Il lieu tar l'extrada Cuira Sid saja tenor il chantun ideal per la polizia da traffic. La polizia da traffic po cuntanscher da la basa anora las vias davent da Maiavilla fin a la Viamala, plinavant sajan ins datiers da la via vers Lai. Planisà èsi da prender en funcziun la basa l'atun 2024. Ella unescha las basas existentas a Cuira ed a Tusaun.

### Standards persistents ed utilisaziun flexibla

Sco la ministra da traffic, *Carmelia Maissen* ha ditg envers RTR, saja la basa in edifiz exemplaric per la strategia da persistenza, decidida en il Cussegl grond en il rom dal «Green Deal». Il nov edifiz duai ademplir standards d'effizienz d'energia e persistenza.

Il bajetg saja in da «nulla emissions». Uschia posseda el moduls da fotovoltaica sin la fatschada. Quels produceschan var trais giadas dapli energia che quai ch'il bajetg dovra. Er ils materials nizzegiads duain esser uschè persistents sco pussibel. Sper bler lain vegn duvrà il material da stgavament per far il betun da l'edifiz. Els locals en il bajetg lubeschan in manschi flexibel.

Las experientschas da quest project duain vegnir nizzegiadas per ulteriurs projects, tant dal chantun sco er en general en la branscha da construcziun, uschia Carmelia Maissen vinavant.



L'emprima badigliada è fatga: (da san.) **Andreas Kohne** (architect chantunal), **Carmelia Maissen** (ministra da traffic) e **Toufiq Ismail-Meyer** (architect).

FOTO LIVIA MAUERHOFER



Ina visualisaziun dal bajetg nov.

VISUALISAZIUN MAD



Las basas da la polizia da traffic en il Grischun. GRAFICA RTR

## Bleuler per Frischknecht

Nik Bleuler è il nov president da la Federaziun Grischuna dal Sport da Tir. El surpiglia quest mandat da Carl Frischknecht ch'è stà il davos sis onns al timun da quell'uniun cun 4500 commembers.

GION NUTEGN STGIER/FMR

A St. Peter en il Scanvetg ha gi lieu la 143avla radunanza da delegads da la Federaziun Grischuna dal Sport da Tir. Dasper ils 145 delegads èn er stadas da la partida numerusas persunas da la politica communal, regiunala, chantunala e naziunala, dal militar e da las federaziuns da tir chantunals vischinas. Tema central da la radunanza da delegads è stà la tscherna d'in nov president u d'ina nova presidenta per l'Uniun da tir chantunala.

### 27 vuschs dapli per Nik Bleuler

Per la successiun da *Carl Frischknecht* (Tumegl) èn sa mess a disposiziun *Nik Bleuler* (Masein) ed *Esther Hug* (Vaz Sut). El ed ella èn gia dapi blers onns engaschads fermamain per il tir, saja quai activ ubain davos las culissas. L'elecziun è stada da gronda tensiun, avevan tant Nik Bleuler sco er Esther Hug las qualitats da daventar successur ubain successura dal president partent.

Nik Bleuler è il davos onns stà fitg activ cun promover tiradurs e tiraduras da la garda giuvna. Ed Esther Hug è stada il davos sis onns secretaria e mainagestiun da la Federaziun Grischuna dal Sport da Tir ed ha fatg quai cun gronda passiun e savida. Elegì è lura vegnì Bleuler – e quai cun in resultat dad 86:59 vuschs. Fiss Esther Hug vegnida elegida sco presidenta, fiss ella stada l'emprima dunna en quest uffizi en l'istorgia da 143 onns da l'uniun che reunescha ils tiradurs e las tiraduras dal Grischun.

### Bler applaus per il president partent

*Hubert Tomaschett* (Rabius) ha tegnì la laudatio per Carl Frischknecht, il president partent da la Federaziun Grischuna dal Sport da Tir. Da dastgar tegnair quella laudatio saja per el



Carl Frischknecht (san.) il president partent da la Federaziun Grischuna dal Sport da Tir cun **Filip Dosch**, il nov uffizier da tir federal dal Grischun.

FOTO GION NUTEGN STGIER

ina vaira onur, ha punctuà il vicepresident da l'uniun. Frischknecht saja stà in parsura da vaglia, ina persuna fidada, in um plain engaschament ed in ami stimà da tiradurs e tiraduras. Sia gronda lavur a favur dal tir e da la federaziun saja stada immensa ed er exemplarica, ha menziunà Hubert Tomaschett.

Carl Frischknecht sez è sa mussà fitg emozional cun prender cumià da ses uffizi. Al tir resta el vinavant fidaivel sco commember da la grupp da matscheurs grischuna.

Testiftgads en lur uffizis èn vegnids *Christian Kübmis* (Tavau-Monstein) sco schef tir 300 meters ed *Anna Marugg* (Cuira) sco schef tir pi-stola. Nov cassier e mainagestiun da l'Uniun da tir chantunala è *Walter Hartmann* (Pragg-Jenaz). Bliers plets da laud ha er retschet *Jöri Kaufmann* (Cuira), l'uffizier da tir federal partent dal Grischun. Gia en uffizi è ses successur *Filip Dosch* (Cunter).

### Festa da tir federala 2026

Sa drizzads a la raspada èn er *Peter Peyer* il president da la regenza grischuna ed il divisiunari *Lucas Caduff*. Omadus han menziunà l'impurtanza dal tir per la cuminanza, la societad, la segirezza ed er la solidaritad. Bunas novas èn er vegnidas dal Cussegl naziunal e president da quel gremi, *Martin Candinas*. El è president dal comitè d'organisaziun da la Festa da tir federala 2026 che ha lieu en trais onns en il Grischun. Da preschent ins saja ferm en contact cun las uniuns da tir purtadoras da la festa e lura er cun il concept da sponsoring, ha ditg Martin Candinas. Tenor plan marscha er l'organisaziun da la Festa da tir chantunala 2024 en l'Engiadina ed en las vals dal sid grischunas. Bunamain 8000 tiradurs e tiraduras vegnan ad esser da la partida a quella occurrenza da tir chantunala l'onn proxim durant il mais da zercladur.